

SOALAN NO. 71

**PEMBERITAHUAN PERTANYAAN BAGI JAWAPAN LISAN**

**MESYUARAT KEDUA, DEWAN RAKYAT**

**PENGGAL KELIMA, PARLIMEN KETIGA BELAS**

**MAJLIS MESYUARAT DEWAN RAKYAT**

**PERTANYAAN : JAWAB LISAN**

**DARIPADA : DATO' SERI TIONG KING SING [BINTULU]**

**TARIKH : 26 / 7 / 2017 [ RABU ]**

**SOALAN :**

Dato' Seri Tiong King Sing [Bintulu] minta **MENTERI PEMBANGUNAN WANITA, KELUARGA DAN MASYARAKAT** menyatakan adakah Kerajaan berhasrat untuk menggubal undang-undang untuk melindungi kebajikan orang tua terutamanya tindakan undang-undang terhadap ahli keluarga terdekat yang meninggalkan orang tua tanpa jagaan.

**JAWAPAN: YB DATO' SRI ROHANI ABDUL KARIM, MENTERI PEMBANGUNAN WANITA, KELUARGA DAN MASYARAKAT**

Tuan Yang Dipertua,

Kerajaan amat prihatin terhadap kesejahteraan dan kebajikan warga emas di Malaysia. Dalam memelihara dan melindungi kebajikan golongan sasar ini, Kementerian Pembangunan Wanita, Keluarga dan Masyarakat (KPWKM) dan agensi-agensi di bawahnya memberi keutamaan kepada **inisiatif untuk memperkuatkan nilai-nilai murni dan kekeluargaan di kalangan ahli masyarakat.** Pendekatan ini adalah untuk menerapkan dan memelihara nilai dan budaya ketimuran di mana penjagaan ibu bapa atau warga emas adalah tanggung jawab ahli keluarga dan bukan sekadar peranan yang dijalankan bagi mematuhi peruntukan undang-undang.

Perkara ini adalah selaras dengan strategi ketiga dalam Dasar dan Pelan Tindakan Warga Emas Negara (2011-2020) iaitu **Keselamatan dan Perlindungan** yang merupakan strategi untuk menjamin hak dan akses

warga emas kepada keperluan asas, keselamatan sosial dan perlindungan daripada pengabaian, penganiayaan serta penderaan. Sekiranya warga emas ditinggalkan tanpa jagaan, KPWKM melalui Jabatan Kebajikan Masyarakat (JKM) juga menyediakan perkhidmatan jagaan dan perlindungan di Rumah Seri Kenangan dan Rumah Ehsan yang ditubuhkan oleh Kerajaan.

Pelbagai inisiatif telah diambil oleh KPWKM bersama kementerian/agensi lain di bawah Pelan Tindakan Warga Emas Negara bagi meningkatkan kesepadan antara generasi dan meningkatkan kesedaran terhadap isu penuaan di kalangan golongan muda, keluarga dan komuniti. Sebagai contoh seminar kesedaran dan promosi, Sambutan Hari Warga Emas pada setiap bulan Oktober dan program kebajikan pelajar ke pusat jagaan warga emas. Jawatankuasa Pembangunan Warga Emas Negeri dan Daerah memainkan peranan penting dalam menjalankan advokasi dan mengenal pasti isu-isu / masalah yang memerlukan perhatian di kalangan pemimpin tempatan dan agensi berkaitan.

Tuan Yang Dipertua,

Walaupun tiada peruntukan undang-undang khusus bagi kes-kes penderaan dan penganiayaan terhadap warga emas, KPWKM berpendapat bahawa perlindungan terhadap warga emas boleh dilakukan dengan memperkuatkuaskan penguatkuasaan perundangan sedia ada.

Perlindungan daripada pengabaian, penganiayaan serta penderaan warga emas adalah dijamin di bawah **Akta Keganasan Rumah Tangga 1994 [Akta 521]** dan **Kanun Keseksaan [Akta 574]**. Peruntukan di bawah **Akta Keganasan Rumah Tangga 1994 [Akta 521]** merangkumi ahli keluarga termasuk orang dewasa tidak berkeupayaan, dalam konteks ini ialah ibu dan bapa. Pada bulan April 2017, KPWKM telah **mencadangkan supaya Akta Keganasan Rumah Tangga dipinda** dengan bertujuan untuk mempertingkatkan lagi perlindungan kepada mangsa dan membantu memulihkan institusi kekeluargaan.

Pindaan ini turut mengambil kira kebijakan warga emas. Cadangan pindaan yang melibatkan warga emas adalah **perluasan tafsiran**

“**Keganasan Rumah Tangga**” yang turut merangkumi perkara berikut iaitu “dengan curang menggelapkan harta mangsa yang menyebabkan mangsa itu mengalami kesedihan kerana kerugian kewangan”. Perluasan tafsiran ini adalah mengambil kira kes yang melibatkan warga emas terutamanya perkara berkaitan pengurusan harta warga emas.

Kesimpulannya, KPWKM berpendapat bahawa penggubalan akta khusus untuk melindungi kebajikan warga emas adalah satu cadangan yang baik untuk jangka masa panjang dengan isu penuaan yang akan menjadi semakin mencabar. KPWKM berpandangan bahawa tanggungjawab penjagaan warga emas perlu dilaksanakan dengan penuh rela dan kasih sayang dan bukannya tertakluk kepada undang-undang semata-mata. Seiring dengan usaha yang telah dilaksanakan oleh pihak Kerajaan dan peruntukan perundangan yang sedia ada, adalah diharapkan agar kesedaran masyarakat umum tentang tanggung jawab menjaga ibu bapa atau warga emas akan meningkat bagi memastikan peranan dan tanggung jawab ini digembleng secara bersama antara Kerajaan dan ahli masyarakat.